

Fegl d'infurmaziun: Stage schurnalistic

Introducziun

Schurnalistas e schurnalists da lingua rumantscha cun ina buna scolaziun ed experientscha da far medias èn dumandads. Perquai porscha RTR mintg'onn minimum ina piazza da stage schurnalistic. La scolaziun unica en lingua rumantscha sa drizza a persunas cun grond interess schurnalistics che vulan lavurar en chasa RTR e pli tard forsa era en ina redacziun regiunala u en autras chasas da medias.

Cundiziuns e survista

Il stage schurnalistic tar RTR cumpiglia ina buna scolaziun pratica durant 2 onns e la pussaivladad da cuntanscher il diplom schurnalistic DAJ (Diplom Ausbildung Journalismus) al MAZ (90 dis scola durant il stage). Las cundiziuns èn:

- vegliadetgna min. da 20 onns, emprendissadi, matura gimnasiala u professiunala, studi u scolaziun equivalenta, bunas conuschientschas d'in idiom rumantsch, d'avantatg èn experientschas schurnalisticas
- ademplir las pretensiuns da recepziun da RTR: sche pussaivel prender part al "lavoratori far medias", persvader cun il dossier ed en il discurs personal, buns resultats en il test da personalitad e qualificaziun concernent la savida generala, expressiun e cumpetenzza linguistica, test da microfon
- absolver in praticum da 3 fin max. 6 mais en chasa RTR che cumpiglia ina part da la scolaziun da basa ed in sustegn personal per la preparaziun da l'examen d'admissiun al MAZ (elavurar il dossier d'annunzia per il MAZ: curriculum vitae, text da motivaziun, video, 2 fin 3 contribuziuns publicadas, cumprova d'engaschament durant la scolaziun)
- reussir l'examen d'admissiun al MAZ (mintgamai il november) per retschaiver il contract definitiv da stagiaire
- absolver la scolaziun interna, externa ed individuala sco stagiaire (emprender differentas furmas da far contribuziuns per radio u television, visitar redacziuns da SRG SSR, autras chasas da medias u studios regiunals, producir ed elavurar in'atgna contribuziun per la pagina da web)

Durant il stage vala in engaschament a temp cumplain (100%). I vegn spetgà ina gronda flexibilitad areguard il temp da lavur (p.ex. fins d'emna, lavurar la saira u la damaun baud). In engaschi tar RTR suenter il stage na vegn betg garanti.

Durant il stage porscha RTR ina scolaziun da basa schurnalistica interna, in accompagnament professiunal tras ina tutora ed ina contribuziun finanziaria vi dals custs dal MAZ.

Finamira

Emprender la professiun schurnalistica e publicistica on the job ed off the job. Quai vul dir, producir contribuziuns che vegnan emessas – uschia che stagiaires valan gia durant il stage adina dapli sco schurnalistas e schurnalists furmadas.